

Rumantsch è ina lingua naziunala, ma ina lingua parzialmain uffiziala da la Confederaziun, numnadamain en la correspundenza cun persunas da lingua rumantscha. La translaziun d'in decret federal serva a l'infurmaziun, n'ha dentant nagina validitad legala.

Lescha federala davart la promoziun dal sport e da l'activitad fisica (Lescha per promover il sport, LPSpo)

dals 17 da zercladur 2011 (versiun dal 1. da schaner 2019)

L'Assamblea federala da la Confederaziun svizra, sa basond sin l'artitgel 68 da la Constituziun federala¹, suenter avair gi invista da la missiva dal Cussegl federal dals 11 da november 2009², concluda:

1. chapitel Disposiziuns generalas

Art. 1 Finamiras

¹ Per augmentar la capacitad fisica e la sanadad da la populaziun sco er la furmaziun cumplexsiva e la coesiun sociala persequitescha questa lescha las suandantas finamiras:

- a. augmentar las activitads fisicas e sportivas sin tut ils stgalims da vegliadetgna;
- b. augmentar la valur dal sport e da l'activitad fisica en l'educaziun ed en l'instrucziun;
- c. stgaffir cundiziuns generalas convegnentas per promover il sport da prestaziun da la generaziun giuvna ed il sport d'elita;
- d. promover cumportaments che franchiseschan las valurs positivas dal sport en la societad e che cumbattan cunter ils fenomens secundars nungiavischads;
- e. impedir accidents da sport e d'activitad fisica.

² La Confederaziun cuntanscha questas finamiras cun:

- a. sustegnair e realisar programs e projects;
- b. prender mesiras cunzunt en ils secturs da la furmaziun, dal sport da prestaziun, da la correctadad e da la segirezza en il sport sco er da la perscrutaziun.

AS 2012 3953

¹ SR 101

² BBl 2009 8189

Art. 2 Collavuraziun cun ils chantuns, cun las vischnancas e cun personas privatas

¹ La Confederaziun collavura cun ils chantuns e cun las vischnancas. Ella resguarda lur mesiras per promover il sport e l'activitad fisica.

² Ella promova l'iniziativa privata e collavura particularmain cun las federaziuns svizras da sport.

2. chapitel Sustegn da programs e da projects

1. secziun Promoziun generala dal sport e da l'activitad fisica

Art. 3 Programs e projects

¹ La Confederaziun coordinescha, sustegna ed iniziescha programs e projects per promover activitads fisicas e sportivas regularas sin tut ils stgalims da vegliadetgna.

² Ella po pajar contribuziuns u furnir prestaziuns materialas.

Art. 4 Sustegn da las federaziuns da sport

¹ La Confederaziun sustegna la federaziun da tetg da las federaziuns svizras da sport e po pajar contribuziuns ad ulteriuras federaziuns naziunalas da sport.

² Ella po far contracts da prestaziuns cun federaziuns da sport per ademplir incumbensas da la promoziun dal sport.

³ En il rom da sias cumpetenzas procura ella che las federaziuns internaziunalas da sport chattian bunas cundiziuns generalas per lur activitads en Svizra.

Art. 5 Implants da sport

¹ La Confederaziun elavura in concept per implants da sport d'impurtanza naziunala, che serve a planisar ed a coordinar ils implants da sport d'impurtanza naziunala. Quest concept vegn actualisà cuntinuadamain.

² La Confederaziun po pajar agids finansials per construir implants da sport d'impurtanza naziunala.

³ Ella po cussegljar ils constructurs ed ils gesturs d'implants da sport.

2. secziun «Giuventetgna e sport»

Art. 6 Program

¹ La Confederaziun maina il program «Giuventetgna e sport» per uffants e giuvenils.

² «Giuventetgna e sport» gida ils uffants e giuvenils a sa sviluppar ed a sa realisar ed als permetta da viver il sport en moda cumplessiva.

³ La participaziun a «Giuventetgna e sport» è pussaivla per l'emprima giada a partir dal 1. da schaner da l'onn che l'uffant cumplenescha 5 onns, e per l'ultima giada ils 31 da december da l'onn ch'el cumplenescha 20 onns.

Art. 7 Collavuraziun

¹ Ils chantuns, las vischnancas ed organisaziuns privatas sa participeschan a la realisaziun dal program «Giuventetgna e sport». Per quest intent po la Confederaziun far contracts da prestaziun.

² Ils chantuns designeschan in'autorità ch'è cumpetenta per la realisaziun dal program «Giuventetgna e sport».

Art. 8 Purschida

En las disciplinas da sport admissas sustegna il program «Giuventetgna e sport» curs e champs per differentas gruppas en mira.

Art. 9 Furmaziun dal cader

¹ La furmaziun dal cader è chausa da la Confederaziun e dals chantuns. Organisaziuns privatas pon vegnir consultadas.

² La Confederaziun surveglia la furmaziun dal cader.

³ Il Cussegl federal definescha las purschidas da la furmaziun dal cader e fixescha las premissas per la concessiun, per la suspensiun, per la revocaziun e per l'annullaziun da las renconuschientschas sco cader da «Giuventetgna e sport».

⁴ L'Uffizi federal da sport (UFSP) decida davart la concessiun, davart la suspensiun e davart la revocaziun da las renconuschientschas sco cader da «Giuventetgna e sport» e constatescha l'annullaziun da talas renconuschientschas.

Art. 10 Examinaziun extraordinaria da la reputaziun

¹ Sch'in indizi concret lascha supponer ch'ina persuna haja commess in delict ch'è incompatibel cun sia funcziun da cader da «Giuventetgna e sport», examinescha il UFSP la reputaziun da questa persuna.

² Sch'igl è pendentia ina procedura penala cunter la persuna, ch'è incompatibla cun sia funcziun da cader da «Giuventetgna e sport», refusescha u suspenda il UFSP la renconuschientscha.

³ Sche la persuna è vegnida sentenziada pervia d'in delict ch'è incompatibel cun sia funcziun da cader da «Giuventetgna e sport», refusescha u suspenda il UFSP la renconuschientscha.

⁴ Per l'examinaziun da la reputaziun da la persuna prenda il UFSP invista da las datas dal register penal pertutgant las sentenzias e pertutgant las proceduras penalas pendentas.

⁵ Las autoritads da persecuziun penala e las dretgiras èn obligadas – sin dumonda en scrit – da dar al UFSPO infurmaziuns complementaras extratgas da las actas penalas respectivas, sche:

- a. quai è necessari per la decisiun davart la concessiun, davart la suspensiun u davart la revocaziun da las renconuschientschas sco cader da «Giuventetgna e sport»;
- b. quai na pregiuditgescha betg ils dretgs persunals da terzs; e
- c. quai na periclitescha betg l'intent da l'inquisiziun penala.

Art. 11 Prestaziuns da la Confederaziun

¹ La Confederaziun paja contribuziuns per curs e per champs sco er per la furmaziun dal cader purschida dals chantuns e da las organisaziuns privatas.

² Ella po metter a disposiziun ad emprest material per realisar il program «Giuventetgna e sport».

3. chapitel Furmaziun e perscrutaziun

1. secziun Sport en scola

Art. 12 Promoziun da pussaivladads da sport e d'activitad fisica

¹ Ils chantuns promovon las pussaivladads quotidianas da far sport ed activitad fisica en il rom da l'instrucziun en scola. Els procuran ch'ils implants e l'equipament necessaris stettian a disposiziun.

² L'instrucziun da sport è obligatorica durant la scola obligatorica e sin il stgalim secundar II.

³ Suentar avair consultà ils chantuns fixescha la Confederaziun il dumber minimal da lecziuns da sport ed ils princips qualitativs per l'instrucziun da sport en la scola obligatorica e sin il stgalim secundar II, cun excepziun da las scolas professiunalas spezialisadas. Ella resguarda ils basegns dals stgalims da scola respectivs.

⁴ En la scola obligatorica èn obligatoricas almain trais lecziuns d'instrucziun da sport per emna.

⁵ Il Cussegl federal fixescha il dumber minimal da lecziuns da sport ed ils princips qualitativs per l'instrucziun da sport en las scolas professiunalas spezialisadas.

Art. 13 Scolaziun e furmaziun supplementara dals magisters

¹ En collavuraziun cun ils chantuns po la Confederaziun sustegnair la scolaziun e la furmaziun supplementara dals magisters che dattan l'instrucziun da sport.

² Suentar avair tadlà la Confederaziun fixeschan ils chantuns il dumber minimal da las uras da scolaziun dals magisters che dattan l'instrucziun da sport e las pretensiuns qualitativas a la scolaziun da tals.

2. secziun Scola auta federala da sport

Art. 14

¹ La Confederaziun maina ina scola auta da sport che porscha ina instrucziun da la scienza da sport, che fa perscrutaziun e che furnescha servetschs e che metta er a disposiziun scolaziuns e furnaziuns supplementaras en il sector terziar.

² L'accreditaziun da la Scola auta federala da sport sa drizza tenor la legislaziun davart l'agid a las scolas autas e davart la coordinaziun en il sector da las scolas autas svizras.

³ Il Cussegl federal regla las premissas per l'admissiun als studis.

3. secziun Perscrutaziun da la scienza da sport

Art. 15

La Confederaziun po sustegnair la perscrutaziun da la scienza da sport.

4. chapitel Sport da prestaziun

Art. 16 Mesiras

¹ La Confederaziun sustegna la promoziun dal sport da prestaziun da la generaziun giuvna e dal sport d'elita.

² Per quest intent prenda ella particularmain las suandantas mesiras:

- a. furnescha servetschs per sviluppar la prestaziun dals sportists d'elita;
- b. sustegna la scolaziun e la furnaziun supplementara dals trenaders;
- c.³ creescha la pussaivladad – per ils sportists d'elita sco er per ils appartegnents da l'armada u da la protecziun civila che vegnan engaschads sco trenaders, sco assistents u sco funcziunaris a favur dals sportists d'elita – da profitar dal servetsch militar u dal servetsch da protecziun civila obligatoric e voluntari per sviluppar la prestaziun e las concurrenzas dals sportists d'elita.

³ Ella po promover purschidas che permettan da cumbinar sport e scolaziun.

Art. 17 Occurrenzas internaziunalas da sport

¹ La Confederaziun po sustegnair l'organisaziun d'occurrenzas e da congress internaziunalas da sport en Svizra, ch'èn d'impurtanza europeica u mundiala, sch'ils chantuns sa participeschan commensuradamain als custs.

³ Versiun tenor la cifra 6 da l'aggiunta da la LF dals 18 da mars 2016, en vigur dapi il 1. da schan. 2018 (AS 2016 4277, 2017 2297; BBI 2014 6955).

² Ella po promover e coordinar la preparaziun e la realisaziun da grondas occurrenzas internaziunalas da sport. Per quest intent collavura ella cun ils chantuns pertutgads e cun las vischnancas pertutgadas sco er cun las federaziuns da sport che organischan l'occurrENZA.

5. chapitel Correctadad e segirezza

1. secziun Mesiras generalas

Art. 18

¹ La Confederaziun s'engascha a favur da la correctadad e da la segirezza en il sport. Ella cumbatta cunter ils fenomens secundars nungiavischads dal sport.

² La Confederaziun collavura cun ils chantuns e cun las federaziuns. Ils agids finansials a la federaziun da tetg da las federaziuns svizras da sport u ad outras organisaziuns da sport ed ad outras instituziuns responsablas per occurrenzas da sport fa ella depender da lur acziuns a favur da la correctadad e da la segirezza en il sport.

³ La Confederaziun po realisar sezza mesiras preventivas en il rom da programs e da projects.

2. secziun Mesiras cunter doping

Art. 19 Princip

¹ La Confederaziun sustegna e prenda mesiras cunter l'abus da products e da metodas che servan ad augmentar la capacidad fisica en il sport (doping), particularmain tras scolaziun, tras cussegliaziun, tras documentaziun, tras perscrutaziun, tras infurmaziun e tras controllas.

² Il Cussegl federal po delegar dal tuttafatg u per part la cumpetenzza da prender mesiras cunter doping ad in'agentura naziunala d'antidoping. Quella decretescha las disposiziuns necessarias.

³ Il Cussegl federal fixescha ils products e las metodas, dals quals l'utilisaziun u l'applicaziun èn chastiablas. En quest connex resguarda el il svilup sin plaun internaziunal.

Art. 20 Restricziun da la disponibladad da products e da metodas da doping

¹ Las unitads administrativas da la Confederaziun, l'Institut svizzer per products terapeutics, ils posts chantunals cumpetents sco er il post cumpetent per mesiras cunter doping tenor l'artitgel 19 collavuran per restrenscher la disponibladad da products e da metodas da doping.

² L'Administraziun da duana annunzia a las autoritads chantunals da persecuziun penala las constataziuns che l'inciteschan da suspectar cuntravenziuns cunter questa lescha.

³ L'Administraziun da duana ha il dretg, sch'ella suspectescha ina cuntravenziun cunter questa lescha, da retegnair products da doping al cunfin u en ils deposits da duana e da consultar il post competent per mesiras cunter doping tenor l'artitgel 19. Quest post fa ils ulteriurs scleriments e prenda las mesiras necessarias.

⁴ Independentamain d'ina eventuala procedura penala po il post competent per mesiras cunter doping tenor l'artitgel 19 disponer da confiscar e da destruir products da doping u objects che servan directamain a sviluppar ed ad applitgar metodas da doping.

Art. 21 Controllas da doping

¹ Tgi che sa participescha a cumpetiziuns da sport po vegnir suttaless a controllas da doping.

² Controllas da doping pon far:

- a. las agenturas naziunalas ed internaziunalas d'antidoping;
- b. la federaziun naziunala da sport e la federaziun internaziunala da sport, a la quala il sportist appartegna, sco er la federaziun da tetg da las federaziuns svizas da sport ed il Comité internaziunal olimpic;
- c. l'organisatur da l'occorrenza da sport, a la quala il sportist participescha.

³ Las autoritads da controlla da doping tenor l'alineia 2 han il dretg d'elavurar las datas personalas ch'ellas registreschan en connex cun lur activitad da controlla, inclusiv las datas personalas spezialmain sensibilas ed ils profils da personalitad, e da las transmetter al post competent per:

- a. evaluar las controllas;
- b. sancziunar ils sportists che fan doping.

⁴ Las autoritads da controlla da doping tenor l'alineia 2 literas b e c communitgeschan ils resultats da lur controllas al post competent per mesiras cunter doping tenor l'artitgel 19.

Art. 22 Disposiziuns penalas

¹ Tgi che – per intents da doping – producescha, acquista, importa, exporta, transferescha, intermediatescha, distribuescha, perscriva, metta en circulaziun, consegna u posseda products tenor l'artitgel 19 alineia 3 u applitgescha envers terzs metodas tenor l'artitgel 19 alineia 3, vegn chastia cun in chastu da detenziun fin 3 onns u cun in chastu pecuniar.

² En cas grevs è il chastu in chastu da detenziun fin 5 onns; ensemen cun il chastu da detenziun vegn pronunzià in chastu pecuniar.

³ In cas grev è avant maun en spezial, sch'il delinquent:

- a. agescha sco commember d'ina banda ch'è s'unida cun l'intent da sa deditgar cuntuadamain a las acziuns designadas en l'alineia 1;

- b. periclitescha en moda spezialmain greva la sanadad u la vita da sportists tras in'acziun designada en l'alinea 1;
 - c. intermediëscha, distribuescha, prescriba u consegna products tenor l'artitgel 19 alinea 3 ad uffants ed a giuvenils sut 18 onns u applitgescha metodas tenor l'artitgel 19 alinea 3 envers questas persunas;
 - d. fa ina gronda svieuta u in gudogn considerabel cun agir a titel professionnal.
- ⁴ Sche la producziun, l'acquisiziun, l'import, l'export, il transit u il possess èn destinads exclusivamain per l'agen consum, na vegn il delinquent betg chastià.

Art. 23 Persecuziun penala

¹ La persecuziun penala è chausa dals chantuns. Per l'inquisiziun pon las autoritads chantunalas da persecuziun penala consultar il post cumpetent per mesiras cunter doping tenor l'artitgel 19 e l'Administraziun da duana.

² Sch'ina controlla da doping cumprova products u metodas tenor l'artitgel 19 alinea 3, infurmescha l'organ che ha fatg la controlla las autoritads cumpetentas da persecuziun penala e transmita tut ils documents a quellas.

³ Tenor l'artitgel 104 alinea 2 dal Cudesch da procedura penala⁴ ha il post cumpetent per mesiras cunter doping tenor l'artitgel 19 ils suandants dretgs da partida:

- a. far recurs cunter disposiziuns da betg avrir l'inquisiziun penala e cunter disposiziuns da sistida;
- b. far protesta cunter mandats penals;
- c. far appellaziun e far appellaziun adesiva cunter ils aspects penals da sentenzias.

Art. 24 Infurmaziun

Las autoritads da persecuziun penala e las autoritads giudizialas cumpetentas infurmeschan il post cumpetent per mesiras cunter doping tenor l'artitgel 19 davart persecuziuns penals iniziadas pervia da cuntravenziuns tenor l'artitgel 22 sco er davart lur conclus. Il Cussegl federal fixescha, tge infurmaziuns che vegnan communigadas.

Art. 25 Barat d'infurmaziuns sin plaun internaziunal

¹ Cun l'intent da cumbatter cunter doping ha il post cumpetent per mesiras cunter doping tenor l'artitgel 19 il dretg da barattar las datas personalas, inclusiv las datas personalas spezialmain sensibilas ed ils profils da personalitad, cun posts da combat cunter doping esters u internaziunals renconuschids, sch'in tal barat da datas è necessari:

- a. per elavurar dumondas medicinalas e per emetter permissiuns medicinalas a favur d'in sportist;

⁴ SR 312.0

- b. per planisar, per coordinar e per realisar controllas da doping tar in sportist;
- c. per annunziar ils resultats da las controllas da doping al post da cumbat cunter doping ester u internaziunal cupotent.

² En ils cas tenor l'alinea 1 litera a dastgan vegnir communitgadas mo las datas ch'èn necessarias per valitar las dumondas e las permissiuns. La communicaziun da las datas dovra il consentiment explicit dal sportist pertutgà.

³ En ils cas tenor l'alinea 1 litera b dastgan vegnir communitgadas mo las suandantas datas:

- a. persunalias;
- b. las infurmaziuns necessarias medicinalas e geograficas per pudair realisar las controllas da doping tenor standards internaziunals.

⁴ Il post cupotent per mesiras cunter doping tenor l'artitgel 19 sto procurar che las datas ch'el ha communitgà na vegnian betg dadas vinavant a terzs betg autorisads. El refusa da communitgar las datas, sch'i smanatscha ina violaziun dals dretgs persunals, particularmain sch'il post che survegn las datas na po betg garantir ina proteccziun adequata da quellas.

3. secziun⁵ Mesiras cunter la manipulaziun da concurrenz

Art. 25a Disposiziun penal

¹ Tgi che offra, empermetta u conceda in avantatg betg dui ad ina persuna ch'exequescha ina funcziun en il rom d'ina concurrenza da sport, a la quala vegnan purschidas scumessas da sport, cun l'intenziun da sfalsifitgar l'andament da la concurrenza da sport a favur da questa persuna u d'ina terza persuna (manipulaziun indirecta), vegn chastià cun in chasti da detenziun fin 3 onns u cun in chasti pecuniar.

² Tgi ch'exequescha ina funcziun en il rom d'ina concurrenza da sport, a la quala vegnan purschidas scumessas da sport, e pretenda, sa lascha empermetter u accepta in avantatg betg dui per sasez u per ina terza persuna cun l'intenziun da sfalsifitgar questa concurrenza da sport (manipulaziun directa), vegn chastià cun in chasti da detenziun fin 3 onns u cun in chasti pecuniar.

³ En cas grevs è il chasti in chasti da detenziun fin 5 onns u in chasti pecuniar; ensemen cun il chasti da detenziun vegn pronunzià in chasti pecuniar. In cas grev è avant maun en spezial, sch'il delinquent:

- a. agescha sco commember d'ina banda ch'è s'unida cun l'intent da sa deditgar cuntinuadamain a la manipulaziun directa u indirecta da concurrenz;
- b. fa ina gronda svieuta u in gudogn considerabel cun agir a titel professional.

⁵ Integrà tras la cifra II 3 da l'aggiunta da la LF dals 29 da sett. 2017 davart gieus per daners, en vigur dapi il 1. da schan. 2019 (AS 2018 5103; BBI 2015 8387).

Art. 25b Persecuziun penala

¹ Per l'inquisiziun pon las autoritads da persecuziun penala competentas engaschar l'autoridad interchantunala da surveglianza e d'execuziun tenor l'artitgel 105 da la Lescha da gieus per daners dals 29 da settember 2017⁶ (LGD).

² En cas ch'i vegn suspectada ina manipulaziun d'ina concurrenza da sport, a la quala vegnan purschidas scumessas da sport, infurmescha l'autoridad interchantunala da surveglianza e d'execuziun tenor l'artitgel 105 LGD las autoritads da persecuziun penala competentas e trametta a quellas tut ils documents.

³ L'autoridad interchantunala da surveglianza e d'execuziun designada tenor l'artitgel 105 LGD ha ils suandants dretgs da partida en las proceduras manadas pervia da cuntravenziuns cunter l'artitgel 25a:

- a. far recurs cunter disposiziuns da betg avrir l'inquisiziun penala e cunter disposiziuns da sistida;
- b. far protesta cunter mandats penals;
- c. far appellaziun e far appellaziun adesiva cunter ils aspects penals da sentenzias.

Art. 25c Infurmaziuns

¹ Las autoritads da persecuziun penala e las autoritads giudizialas competentas infurmeschan l'autoridad interchantunala da surveglianza e d'execuziun tenor l'artitgel 105 LGD⁷ davart proceduras penals instradadas pervia da cuntravenziuns tenor l'artitgel 25a sco er davart lur decisziuns.

² Il Cussegl federal fixescha, tge infurmaziuns che vegnan communitgadas.

6. chapitel Organisaziun e finanzas**1. secziun Organisaziun****Art. 26** UFSP0

¹ Il UFSP0 ademplescha las incumbensas che resultan per la Confederaziun or da questa lescha, nun che auters servetschs federals s'occupian da quellas.

² Tenor la Lescha federala dals 17 da zercladur 2011⁸ davart ils systems d'infurmaziun da la Confederaziun en il champ dal sport è el responsabel per ils systems d'infurmaziun.

³ El maina la Scola auta federala da sport sco er ils dus centers da curs e da scolaziun a Magglingen ed a Tenero.

⁴ Cun definir l'organisaziun dal UFSP0 resguarda il Cussegl federal las incumbensas da la Scola auta federala da sport.

⁶ SR 935.51

⁷ SR 935.51

⁸ [AS 2012 4639. AS 2016 3541 art. 37]. Guardar oz: LF dals 19 da zer. 2015 (SR 415.1).

Art. 27 Participaziun ad organisaziuns ed instituziun d'organisaziuns

Per ademplir sias incumbensas po la Confederaziun sa participar ad organisaziuns privatas u publicas u instituir organisaziuns spezialas.

2. secziun Finanzas**Art. 28** Finanziaziun da programs e da projects

¹ Per nominar e per finanziair programs da plirs onns e projects po la Confederaziun far incaricas da prestaziun.

² Sche questa lescha na prevesa nagut auter, sa participeschon chantuns e personas privatas adequatamain a la finanziaziun. La Confederaziun vul cuntanscher soluziuns collegialas.

³ L'Assamblea federala permetta l'import maximal dals meds finansials per plirs onns cun in conclus federal simpel.

⁴ En il rom dals credits deliberads conceda la Confederaziun agids finansials.

Art. 29 Prestaziuns commercialas

¹ Il UFSPO po furnir prestaziuns commercialas a personas u ad organisaziuns che han in interess spezial da sias instituziuns u da ses servetschs, sche quellas:

- a. stattan en in stretg connex cun sias incumbensas principalas;
- b. na pregiuditgeschan betg l'adempliment da las incumbensas principalas; e
- c. na pretendan betg meds materials e persunals supplementars considerabels.

² Il UFSPO sto fixar pretschs confurms al martgà per sias activitads commercialas e concepìr la contabilitad dal manaschi uschia ch'i pon vegnir cumprovads ils custs ed ils retgavs da las singulas activitads. In subvenziunament traversal da las activitads commercialas n'è betg permess.

7. chapitel Execuziun e mesiras administrativas**Art. 30** Cumpetenzas dal Cussegl federal

¹ Il Cussegl federal decretescha las disposiziuns executivas.

² El po autorisar il UFSPO da decretar prescripziuns tecnicas per:

- a. «Giuventetgna e sport»;
- b. l'organisaziun e la gestiun da la Scola auta federala da sport;
- c. ils cuntegn dals singuls studis da la Scola auta federala da sport.

Art. 31 Cumpetenzas dal DDPS

Il Departament federal da defensiu, protecziun da la populaziun e sport (DDPS):

- a. definescha las disciplinas da sport e las singulas gruppas en mira da «Giuventetgna e sport» sco er ils criteris per sustegnair las gruppas en mira;
- b. definescha ils criteris per renconuscher purschiders da curs e da champs dal program «Giuventetgna e sport»;
- c. fixescha las premissas per l'emprest da material e regla la participaziun als custs;
- d. fixescha ils studis e las taxas d'inscripziun e d'examen a la Scola auta federala da sport;
- e. decretescha prescripziuns davart l'administraziun dals meds finansials da terzs;
- f. decida davart la concessiun da contribuziuns federalas per projects da perscrutaziun da la scienza da sport.

Art. 32 Refusa u dumonda da restituziun d'agids finansials

¹ La Confederaziun po refusar u dumandar la restituziun d'agids finansials, sche:

- a. els èn vegnids obtegnids cun agid d'indicaziuns fallidas u che mainan en error;
- b. las cundiziuns na vegnan betg ademplidas u las pretensiuns betg observadas;
- c. els èn destinads per «Giuventetgna e sport», ma na vegnan betg utilisads per activitads en quest rom;
- d. la federaziun da tetg da las federaziuns svizras da sport u outras organisaziuns da sport u outras instituziuns responsablas per occurrenzas da sport che vegnan promovidas tenor questa lescha, n'adempleschan betg lur obligaziuns en il sectur da la correctadad e da la segirezza en il sport, particularmain en il cumbat cunter doping.

² Las organisaziuns falliblas pon vegnir exclusas da l'ulteriura promoziun.

³ Ils artitgels 37–39 da la Lescha da subvenziuns dals 5 d'october 1990⁹ na vegnan betg applitgads per cas tenor l'alinea 1 litera c.

8. chapitel Disposiziuns finalas**Art. 33** Aboliziun dal dretg vertent

La Lescha federala dals 17 da mars 1972¹⁰ davart la promoziun da gymnastica e sport vegn abolida.

⁹ SR 616.1

¹⁰ [AS 1972 897, 1987 107, 1994 1390, 1995 1458, 2000 1891 cifra V 2, 2001 2790 agiunta cifra 1, 2007 5779 cifra II 6]

Art. 34 Midada dal dretg vertent...¹¹**Art. 35** Disposiziuns transitoricas

Fin a l'entrada en vigur da la legislaziun davart l'agid a las scolas autas e davart la coordinaziun en il sector da las scolas autas svizras valan per la Scola auta federala da sport las suandantas disposiziuns:

- a. la Scola auta federala da sport collavura cun las scolas autas spezializadas existentas. Il DDPS è cumpetent per far las cunvegns correspondentas;
- b. il DDPS è cumpetent per l'accreditaziun dals studis; el po decretar directives.

Art. 36 Coordinaziun da l'artitgel 367 alinea 2^{quinqies} Cudesch penal cun la midada dals 19 da mars 2010 da la Lescha militar

Independentamain dal fatg, sche la midada dals 19 da mars 2010¹² da la Lescha militar dals 3 da favrer 1995¹³ u la midada qua avant maun entra en vigur sco emprima, daventa – cun l'entrada en vigur da la lescha ch'entra en vigur pli tard sco er en cas ch'ellas entran en vigur il medem mument – l'artitgel 367 alinea 2^{quinqies} dal Cudesch penal (CP)¹⁴ l'artitgel 367 alinea 2^{sexies} CP.

Art. 37 Referendum ed entrada en vigur

¹ Questa lescha è suttamessa al referendum facultativ.

² Il Cussegl federal fixescha l'entrada en vigur.

Data da l'entrada en vigur: 1. d'october 2012¹⁵

¹¹ Las midadas pon vegnir consultadas en la AS **2012** 3953.

¹² AS **2010** 6015 e **2011** 487

¹³ SR **510.10**

¹⁴ SR **311.0**

¹⁵ COCF dals 23 da matg 2012.